

Protocol fat bun da la radunanza cumünala dals 1. settember 2011**Protocol no.12****Radunanza cumünala dals 21 lügl 2011, 20.15 – 23.15**

Preschaintas: 41 personas

S-chüsats: Martin Pernet, Andri Poo e Patrizia Wieser

Il capo constata cha la radunanza saja gnüda convocada in basa a nossa constituziun cumünala e dumonda sch'inchün haja da far objecziuns. Sainza chi vegnan fattas objecziuns, vegnan nominats seguaints scrutinadurs: Thomas Hugentobler e Duri Fried

Protocol

Il protocol no. 11 da la radunanza cumünala dals 16 december 2010 vain approvà.

1 9 FINANZAS ED IMPOSTAS
Rendaquint cumünal 2010

Il capo repassa chapitel per chapitel dal quint da gestiun e remarcha ils posts chi muossan üna differenza plü gronda in congual cun l'on avant e cul preventiv. Ils schefs dals differents decasteris dan üna cuorta survista da lur departamaints e differentas dumondas vegnan respusas.

Il quint cumünal 2010 serra giò cun entradas da fr. 8'317'241.79 e sortidas da fr. 8'266'610.72. Davo resguardadas las amortisaziuns ill'otezza da fr. 955'903.75 resta ün vanz da fr. 50'631.07.

A regard il quint d'investiziun sun gnüts investits dal 2010 fr. 2'935'807.99. Davo trattas giò las entradas da fr. 1'281'586.95 resta ün'investiziun netta a charg dal Cumün da fr. 1'654'221.04.

Il bilantsch cumünal 2010 muossa ün chapital agen da fr. 1'085'297.97.

Il president da l'ameglioraziun preschainta cuort e summaricamaing il rendaquint da l'ameglioraziun pel 2010.

Il president da la cumischiun sindicatoria, sar Andri Lansel, orientescha sur da la revisiun fatta tras il büro da la Lischana Fiduziari SA da Scuol e sur da la lavur da la cumischiun in connex cul rendaquint cumünal. A man da cifras indicativas da finanzas declera el la situaziun generala dal Cumün da Sent. Ils decasteris d'aua, chnalisaziun, electric ed immundizchas han pudü s-chaffir reservas. Ils fits per impraists sun pel mumaint fich favuraivels. Tuot in tuot as preschainta la situaziun finanziaria dal cumün da Sent allegraivla. Oters tschögns e cussagls al Cussagl cumünal stan scrits aint il rapport detaglià da la revisiun. La cumischiun sindicatoria propuona a la radunanza d'acceptar il quint dal Cumün e quel da l'ameglioraziun sco preschantats e da dar dis-charg als organs respunsabels. La radunanza cumünala decida in scrutin avert, sainza cuntravusch, da far bun il quint cumünal, il quint da gestiun, il quint d'investiziun, il bilantsch cumünal e'l quint da l'ameglioraziun pel 2010.

Ulteriuras orientaziuns da la cumischiun sindicatoria

Il president da la cumischiun sindicatoria orientescha sur da duos fatschendas cha la cumischiun as sentiva in dovair da sclerir.

1. A regard l'andamaint da surdattas da lavur, concernent impustüt ils onuraris dals indschegners, ha l'examinaziun tras ün perit independent muossà il seguaint:
 - L'onurari d'indschegner dal proget da la lingia d'aua da baiver Spinatscha-Tuols d'eira correct, però calculà vaira ot,
 - L'onurari d'indschegner dal proget dal Bügl da Plaz d'eira percunter calculà vaira bass.
 - L'onurari d'indschegner dal proget per la seperaziun da l'aua persa a Crusch d'eira aint illa norma.
2. A regard las differenzas tanter il capo e sar Dumeng Jann ha la cumischiun sindicatoria contactà l'inspectorat da cumüns chi ha cussglià il seguaint:
 - L'intermediaziun tanter l'executiva ed ils votants nun es chosa da la cumischiun sindicatoria. Il Cumün ha però la pussibilità da surdar la fatschenda ad ün jurist independent.

La cumischiun sindicatoria ha dat inavant las infuormaziuns dal inspectorat da cumüns al Cussagl cumünal. Quel ha però decis da na impegnar ad ün jurist e da resguardar la chosa per evasa.

Davo l'explicaziun dal president da la cumischiun sindicatoria piglia il capo il pled e conceda cha cun dar ün permiss da fabrica sajan capitats duos sbagls our da negligenza chi's vess eventualmaing, cun esser plü attent, pudü evitar, ma cha otramaing saja'l da l'avis d'avair agi correctamaing ed absolut confuorm a la responsabilità cha'l post da capo pretenda.

Sar Dumeng Jann survain eir l'ocasiun da s'exprimer a regard la fatschenda chi, our da seis punct da vista, nu saja amo sclerida sufficiaintamaing. El intuna cha illa chasa da la figlia dal capo saja gnü dat ün permiss per ün tagl aint il tet cunter ledscha. Ün'avicinaziun da las posiziuns nu po la radunanza constattar ed ella inchamina a la prosma tractanda.

Reglamaint per la remuneraziun dals ufficiants cumünals pel trienni 2012/2014

Il capo preschainta il reglamaint da remuneraziun dals ufficiants cumünals pel trienni 2012-2014. Il Cussagl cumünal propuona da laschar las remuneraziuns sül nivel sco fin uossa. Conguals cullas tarifas da remuneraziun dals cumüns vaschins demuossan, cha las indemnisaziuns dal cumün da Sent sun plü o main aint in quel rom.

Ün votant fa la proposta da dozzar las pauschalas dals ufficiants per 10% causa cha las tarifas nu sajan mai gnüdas adattadas d'ürant ils ultims desch ons.

Il capo metta in votumaziun las duos propostas cul esit cha la proposta dal Cussagl cumünal vain acceptà in scrutin avert cun 26 cunter 6 vuschs.

Mür da sustegn Chasellas – Credit fr. 45'000.—

Il schef da fabrica preschainta il proget per rimplazzar il mür vegl da sustegn pro la chasa da sar Gian Lardi tras ün nouv. Quist proget corregiss il trassè da la via uschè cha la via gniss in quel lö per var 50 – 60 cm plü largia. Ils cuosts dal mür nouv sun calculats cun raduond fr. 45'000.-.

Our da divers votums as po constattar cha ün'amegldramaint dal access in quel lö füss bainschi giavüschabel, ma chi dess eventualmaing amo otras soluziuns per optimar il trassè co la varianta preschantada.

La radunanza decida cun gronda majorità da vuschs da metter inavò quist credit e d'incumbenzer il Cussagl cumünal da tscherchar amo otras variantas per schlargiar il passagi in quist lö.

5

VARIA

Il capo da liber la tractanda varia da la quala nu vain fat adöver.

L'actuara: